

## Morning Regional Dogri News Bulletin, 09 July 2024

मार्निंग डोगरी न्यूज़ बुलेटिन, समें. 09.20 Hrs

<><><><><><>

### Headlines

- 1- कठफआ जिले दी मछेडी थाहर होए दे आतंकवादी हमले च 1 जेसीओ सने 5 जवान शहीद होई गए।
- 2- प्रधानमंत्री नरेंद्र मोदी होर रूस दे राष्ट्रपति व्लादिमीर पुतिन हुंदे कन्नै अज्ज मास्को च 22में सालाना शिखर सम्मेलन दी सह अध्यक्षता करंगन।
- 3- 29 जून थमां शुरू होई दी श्री अमरनाथ जी दी जातरा च बाबा बर्फानी दे दर्शन करने आहले श्रद्धालुएं दी गिनतरी 2 लकख दा आंकड़ा पार करी गई ऐ।
- 4 ते महिला क्रिकेट च अज्ज चेन्नई दे एम.ए चिदंबरम स्टेडियम च श्रृंखला दा त्रीया ते अखीरला टी-20 मैच भारत ते दक्खन अफ्रीका बश्कार खेड्ढेया जाग।  
हुन खबरें दी तफसील कन्नै श्रुति खजारिया।

-----  
<><><><><><>

### J&K Terror Attack

कठुआ जिले च कल इक आतंकी हमले च फौज दे इक जे.सी.ओ सने 5 सैनिक शहीद होई गेन जिसले जे 5 दुए घायल होए देन। आकाशवाणी दे जम्मू संवाददाता दी जानकारी मुजब एह हमला आतंकवादिएं जिले दी बिलावर सब डिविजन च पाँदे मछेडी इलाके दे बदनोता ग्रां च

कीता। जानकारी मुजब कल दपैहरी जिसले फौज दियां गड्डियां मछेडी-किंडली-मल्हार सड़कें पर गश्त पर हियां, उत्थे छप्पे दे आतंकवादिएं घात लाइए उंदे पर हमला कीता। आतंकवादिएं पैहले इक गड्डी पर ग्रेनेड सुट्टेया ते ओदे बाद आटोमैटिक थेआरें कन्नै अन्नेवाह गोलियां चलाना शुरू करी दिता। सुरक्षाबलें जवाबी गोलीबारी कीती पर आतंकवादिएं कन्नै लगदे जांगली इलाके च नस्सी गे। हमले आले इलाके च तुपाई अभियान चलाया जारदा ऐ। घायल सैनिकें गी इलाज लेई पुजाया गेआ। शहीद सैनिकें च नायब सूबेदार अनंत सिंह, हेड कांस्टेबल कमल सिंह, राइफलमैन अनुज सिंह, राइफलमैन असर्श सिंह ते नायक विनोद कुमार शामिल न। तुपाई अभियान बारै होर जानकारी गी बलगेया जा रदा ऐ।

<><><><><><>

### Rajnath

रक्षा मंत्री राजनाथ सिंह होरें कठुआ जिले च होए दे आतंकवादी हमले दी सख्त लफजें च निंदेआ कीती। उनें शहीद सैनिकें दे परौआरें प्रति दुख ते बसोस जाहिर कीता। उनें आखेआ जे दुख दी इस घड़ी च मुख्य इंदे कन्नै ऐ। रक्षा मंत्री होरें आखेआ जे इस हमले लेई जिम्मेदार लोकें गी बखशेया नेई जाग।

<><><><><><>

### PM-Russia-Arrival

प्रधानमंत्री नरेंद्र मोदी होर अज्ज मास्को च रूस दे राष्ट्रपति व्लादिमीर पुतिन हुंदे कन्नै भारत ते रूस बश्कार 22में सालाना शिखर सम्मेलन दी सह अध्यक्षता करंगन। सालाना शिखर सम्मेलन दौरान प्रधानमंत्री मोदी ते राष्ट्रपति पुतिन रक्षा बपार-निवेश सरबंध, उर्जा सहयोग,

शिक्षा, संस्कृति ते लोकें बशकार आपसी संपर्क सने दपकखी मुद्दें दी समीक्षा करंगन। ओह आपसी हितें दे क्षेत्रीय ते वैश्विक विकास पर बी अपना-अपना नजरिया सांझा करंगन। दवें नेता ब्रिक्स, शंघाई सहयोग संगठन, जी-20, पूर्वी एशिया, शिखर सम्मेलन ते संयुक्त राष्ट्र ज्नेय समूहें च दपकखी सरबंधें दे हालात दा आंकलन करंगन। श्री मोदी रूस ते आस्ट्रिया दी त्रै दिनें दी आधिकारिक जातरा पर कल शामी मास्को पुज्जे हे। पुज्जने मगरा प्रधानमंत्री हुंदा स्वागत रूस दे उप प्रधानमंत्री डेनिस मंटुरोव होरें कीता। राष्ट्रपति पुतिन होरें कल शामी प्रधानमंत्री हुंदे आस्तै इक निजी रात्रिभोज दा आयोजन कीता हा। प्रधानमंत्री मोदी होर अज्ज रूस च भारती समुदाय कन्नै गल्लबात करंगन। ओह क्रेमलिन च सैनिकें गी पुष्पांजलि अर्पित करंगन ते मास्को च प्रदर्शनी स्थल पर रोसांटाय पवेलियन दा दौरा करंगन। एहदे मगरा प्रतिनिधिमंडल स्तर दी गल्लबात करने दा कार्यक्रम ऐ।

<><><><><><>

### LG Ek Ped

उपराज्यपाल मनोज सिन्हा होर कल एक पेड़ मां के नाम आल मुहिम च शामिल होए। इस मुहिम गी प्रधानमंत्री नरेंद्र मोदी होरें शुरू कीता हा। उपराज्यपाल होरें राजभवन श्रीनगर च गोल्डन सायप्रस लाया। उनें लोकें गी अपील कीती जे ओह इस अभियान च शामिल होन ते अपनी मां प्रति सम्ममान ते श्रद्धा जाहर करदे होई इक बूहटा लान ते अपना धरती माता ते पर्यावरण दी हिफाजत प्रति समर्पण जाहिर करन।

<><><><><><>

### CS-Digital

डिजिटल भारत दे लक्ष्य गी पूरा करने दे मद्देनजर मुख सचिव अटल डुल्लू हों बकख-बकख सरकारी दफतरें, जिंदे च डिप्टी कमिशनरें, ब्लॉक डिवेलपमेंट तहसील, समाज कल्याण ते विश्वविद्यालय बी शामिल न, केंद्र प्रायोजित स्कीमें लेई नमें लक्ष्य निर्धारित करने लेई आखेआ ऐ। सब्बनें जिलें दे अतिरिक्त डिप्टी कमिशनरें गी नमें लक्ष्य तैय करने दी प्रक्रिया च तेजी आनने लेई नोडल अफसर नामजद कीता गेआ ऐ। आधिकारिक जानकारी मुजब हूनै तोड़ी 625 नमीं केंद्र प्रायोजित स्कीमें दी स्थापना कीती गई ऐ। ऐसी 13 जहार 81 स्कीमें च 537 PACs ते 2 जहार 160 FPs जम्मू-कश्मीर च डिजि सेवा पोर्टल पर सेवा देआ रदे'न।

<><><><><><>

### J&K Pensioner

पेंशनरें दे पिंशन सरबंधी मामलें दे तौले हल लेई इक मंच उपलब्ध करोआने दे मकसद कन्नै प्रिंसीपल एकाउंट जनरल जम्मू-कश्मीर ते डिप्टी एकाउंटेंट जनरल आस्सेआ पिंशनी होई चुके दे लोकें ते उंदे परौआर आलें गी साद्दा दित्ता गेआ ऐ जे ओह आपूं आई अपनी समस्या गी दर्ज करोआन। आधिकारिक जानकारी मुजब पिंशनी होई चुके दे कोई बी व्यक्ति कम्मकाज आले सारे दिनें च 2 बजे थवां 4 बजे तोड़ी P.A.G ते D.A.G दफतर आइए अपनी समस्या जां फही शकैत गी दर्ज करोआई सकदे न।

<><><><><><>

### Sampoornata Poonch

आकांक्षी ब्लाक प्रोग्राम दे हिस्से दे तौर पर पुंछ जिले दे मनकोट ब्लाक दे दूर दरेडे इलाके च सम्पूर्णता अभियान चलाया गेआ। पुंछ दे डिप्टी कमिशनर वाई.एम चौधरी होरें होरनें दुएं अफसरें कन्नै एहदा उद्घाटन कीता। इस अभियान च लोकें दी खासी शमूलियत दिक्खने गी लब्बी जेड़े बक्ख-बक्ख ग्रएं थवां उत्थे पुज्जे। पुंछ थवां आकाशवाणी संवाददाता कन्नै गल्ल करदे होई ग्रामीणें सरकारी स्कीमें थवां लाह ठोआइए हासिल फायदें बारै बोलदे होई आखेआ।

<><><><><><>

### Shri Amarnath Yatra

29 जून गी शुरू होई दी श्री अमरनाथ जी दी जातरा दे पैहले 11एं दिनें च पवित्र गुफा च मत्था टेकने आलें दी गिनतरी 2 लक्ख दा आंकड़ा पार करी गई ऐ। कल संगारे 24 जहार 879 श्रद्धालुएं दे पवित्र गुफा च शिवें दे हिमलिंग रूप दे दर्शन करने दे कन्नै गै अजें तोड़ी 3 जहार 880 मीटर दी उंचाई पर हिमालय दी गोदें च वाका अमरनाथें दी गुफा च हाजरी देने आले श्रद्धालुएं दी गिनतरी 2 लक्ख 7 जहार 16 तोड़ी पुज्जी गई। तोआई श्री अमरनाथ यात्रुएं दा अगला जत्था जम्मू दे भगवती नगर यात्री निवास बेस कैंप थमां बाबा बर्फानी हुंदे दर्शन आस्तै कश्मीर रवाना होआ। यात्रु 213 लौहकी-बड्डी गड्डिएं च अज्ज सबेरे जम्मू थमां निकले। एहदे च 4 जहार 203 मर्द, 1 जहार 117 महिलां, 18 न्याने, 83 साधु ते 12 साध्वियां शामिल न। 1 जहार 971 यात्रु बालटाल आस्तै बड्डलै मुंह न्हरे 3 बज्जिये 13 मिंटें पर 3 जहार 462 यात्रु ते 4 बज्जिए 3 मिंट पर पहलगाम आस्तै रवाना होए जित्थूं ओह अपनी अग्गे दी जातरा शुरू करंगन।

<><><><><><>

## Sarthal Yatra

किश्तवाड़ दे डिप्टी कमिश्नर डॉ. देवांश यादव होरें इस म्हीने दी 14 तरीक गी शुरू होआ रदी श्री सरथल देवी जी दी जातरा सरबंधी तैयारियें गी मुकदा रूप देने लेई बैठक दी अध्यक्षता कीती। किश्तवाड़ दे स्हाड़े आकाशवाणी संवाददाता कैलाश नाथ नै जानकारी दिती ऐ जे बैठक च मुतलका मैहकमे दे आला अफसरें सने पुलस दे वरिष्ठ अधिकारी ते समाजी-धार्मिक संगठनें दं नुमायंदे बी हिस्सा लैता ते एह जानकारी दिती गई जे शोभा यात्रा 14 जुलाई 2024 गी गौरी शंकर मंदर सरकूट थमां शुरू होग। किश्तवाड़ दे एसएसपी होरें भरोसा दोआया जे जातरा दे दौने ध्याड़े जातरा आले रस्ते पर सुरक्षा दे पुखता बंदोबस्त होंगन। एहदे मगरा डीसी किश्तवाड़ होरें श्रद्धालुएं लेई बिजली ते पानी आपूर्ति, स्वच्छता ते आने-जाने लेई पर्याप्त यातायात सुविधा दी बवस्था करने दी हिदायतां दितियां।

<><><><><><>

## Surinsar

खातर तवज्जो सरबंधी मैहकमे दियां आयुक्त सचिव डा. रश्मि सिंह होरें सरूईसर च इक पब्लिक दरबार लोआया तां जे मकामी लोकें गी अपनी दिक्कत-परेशानियां दस्सने लेई इक मंच थहोई सकै। इस पब्लिक दरबार च बक्ख-बक्ख मुद्दे ते बुनियादी जरूरतें पर लो पाई गई जिंदे च मेडिकल अमले दी लोड़, बिजली सरबंधी समस्या ते प्रधानमंत्री ग्राम सड़क योजना तैहत शिड़क परियोजनां बगैरा शामिल हियां। उनें बक्ख-बक्ख स्कीमें तैहत ढांचागत विकास सरबंधी परियोजनाएं दी स्थिति दा आंकलन कीता ते मुतलका अफसरें गी हिदायत दिती जे ओह इस

गल्ला गी यकीनी बनान जे लोकें गी उंदे अधिकारें बारै ते उंदे कल्याण लेई सरकार आस्सेआ चलाई जा'रदी बक्ख-बक्ख स्कीमें बारै जानकारी होवे।

<><><><><><>

### Udh. PMNAM

देसै दे नौजोआनें गी करियर दे मौकें गी बढ़ावा देने दे मकसद कन्नै प्रधानमंत्री नरेंद्र मोदी हुंदे नजरिये मताबक कौशल भारत मिशन तैहत कौशल विकास ते उद्यमिता मंत्रालय नै उधमपुर च प्रधानमंत्री राष्ट्रीय सिखलाई मेले दा सरिस्ता कीता गेआ। मकामी नौजोआनें गी सिखलाई दे मौके उपलब्ध करोआने ताईं नेकें मकामी कारोबारियें ते संगठनें गी इस मेले दा हिस्सा बनने लेई साद्दा दित्ते गेदा हा। उधमपुर जिले दे नेकें इलाकें थमां नौजवानें इस मेले च हिस्सा लैता। स्हाड़े जिला संवाददाता कन्नै गल्ल करदे होई आई.टी.आई उधमपुर दे सुप्रिंटेंडेंट रविंद्र सिंह भट्टी ते किश विद्यार्थियें आखेआ।

<><><><><><>

### Women Cricket

भारतीय महिला क्रिकेट टीम अज्ज चेन्नई दे एम.ए चिदंबरम स्टेडियम च टी-20 मैचें दी श्रृंखला दे त्रीए ते अखीरले मैच च दक्खण अफ्रीका खलाफ खेड्ढोग। एह मैच संझा 7 बजे शुरू होग। दक्खण अफ्रीका श्रृंखला च 1-0 कन्नै अगगे ऐ। उन्नै इससै मैदान पर पैहला मैच 12 रन्जें कन्नै जित्तेआ हा जिसले कि दुआ मैच बरखा करी रद्द होई गेआ हा। हरमनप्रीत कौर दी अगुवाई आली भारती टीम इस मैच गी जित्तिए श्रृंखला गी बराबर करने दी कोशिश करोग।



## Weather

जम्मू ते एहदे आले-दोआले दे इलाकें च अद्धी रातीं लै होई दी बरखा करी लोकें गी गुम्में थवां किश राहत थहोई ऐ। जम्मू च कल बद्दोबद्द तापमान 36 अशारिया 2 डिग्री सेल्यिस दर्ज कीता गेआ।

